



Trump-i Israel tir dang Netanyahu
nem tatok agütsütsü asüngdang



Messi-i Telangana yimtiba
semdangtsü jangjaago

Walunir Imkong L Imchen nem Nagaland-i tetushi agüja meinoktsüogo



(Abelen) Kohima nung state funeral sentong ayonga agiba aser (Achiji) Ao Senden-i ayonga asen lenir asür Imkong L. Imchen nem tatembang akhüm tetushi agüja Mokokchung yimtiba Police Point nung tepila sentong agiba mapang Ao Senden tir Marsanen Imsongi jembidang tangokba noksa angur.

Kohima, November 12, 2025 (TYO): Nagaland nung yimtenren lennir tain rongnung ka Walunir Imkong L Imchen nem tanü tetushi tulu agüja asüpila sentep sentong agiogo.

Walunir Imkong L Imchen ya Nagaland sorkar nung Information and Public Relations, aser Soil and Water Conservation Advisor teinyakdak liasü aser tanü Old Ministers' Hill, Kohima nung par kidang state funeral sentong ayonga agi.

Walunir Imkong L Imchen temang nung timtem adokba ajanga Honibarnü Naga Hospital Authority, Kohima nung anioka liasü aser Hombarü tayimtsü ajanga Guwahat-i anir ao, saka Mongulbar nikongdang 2:00 ako meta pa arishi tembang.

Pa arishi küm 75 liasü aser pa pa kinungtsü, jala ana, jabaso asem aser semchir 13 yutsür ogo.

Tanü Chief Minister Neiphiu Rio, Nagaland Legislative Assembly Speaker Sharingain Longkumer aser Chief Secretary Sentiyanger Imchen nungeri anir nisungtemi kümsük punguben tashi MLA inyangsang Imkong

mangjak nung tetushi agüja liasü. Chief Minister Neiphiu Rio-i o jembidang Walunir Imkong L Imchen asüba atema temulung raksaba aser pa den mapang talangka nungi külemi inyaksema aruba indang ashi.

"Imkong Imchen ya sasapela aser temulung nung bilemba jembir ka liasü. Pa ya kanga dang tasütait lennir ka liasü. Pa ya alizüing ayuba lennir ka liasü aser kin balala sanger den sendaktepa liyonga aru. Pai pa takü piyong nübortem yaritsü asoshi bendanga agüja inyak" ta CM Rio-i ashi.

Pa asüba ya Aor dang masü saka Naga nunger ajak akoksar aser par kibong den asükhu lemsateper ta paisa shisem.

"Imkong Imchen ya public tenzüksü bendanga agütsüba lennir ka liasü. Pa kaketshir mapang lennir inyakba nungi ministry balala ketdangsüa aruogo" ta Speaker Sharingain Longkumer-i ashi.

"Asür Imkong-i Home, Health, Education, aser Environment wadangtem nung mapa tajungtem inyaktsüogo aser

pai toktsüba senmang ajanga nübortem teti ajungmesotsü. 14 buba NLA tenüing nung Mrs. Alila Imchen, tena chirnurtem aser kinungertem den asükhu lemsateper" ta Sharingain-isa ashi.

Soil & Water Conservation aser Information & Public Relations department tem nungia ketdangsürtemi asür nem tetushi agüja jembir.

"Imkong Imchen ya shisatsü akaba lennir ka liasü aser pa lenisüba kübok ketdangsübaren akangshiogo" ta BJP Nagaland tenüing nung jembidang taoba party president aser Minister Temjen Imna Along-i ashi.

Naga Students' Federation (NSF) president Mteisuding den Kohima Aor Telongjem aser Mangmetong Senso Telongjem Kohima tanishirtemia asür Imkong nem tetushi agüja jembir.

Walunir Imkong L Imchen -i 1983-85 kümsük nung NSF general secretary inyaka liasü.

"Asür Imkong dak shisatsü kanga liasü, ketdangsübaren kanga tajung aser public tenzüksü tenangzüka tulu liasü. Pai

teküpoktiba jenjang nung alirtem den tesentaktep tajung liasü aser BJP state unit-i pa lenisüba kanga nüksia repring" ta BJP Nagaland state unit president Benjamin Yephthomi-i ashi.

"Pa asüba ya par kibong aser medemertem atema dang masü saka political fraternity atema takoksa tulu lir. Pa shisatsü, lenisüba aser arishi piyong nübor loktiliba tenzüka ya kodanga mamadoktsü" ta Benjamin-isa shisem.

Iba sentong nung Kohima Ao Baptist Arogo nung Senior Pastor Rev. Sentisashi Aier-i Tsüngrem o jembir.

Sentong nungsa State honour agütsüba tenüing nung ceremonial Guard of Honour aser gun salute agütsü. Iba sülen pa mang Mokokchung district kübok par tasoyim Mangmetong-i bener ao aser idakji asüing aremtsü.

Ao Senden-i akhüm tetushi agütsü:

Ao Senden-i ayonga asen lenir asür Imkong L. Imchen nem tatembang aküm tetushi agüja Mokokchung yimtiba Police Point nung tanü nikongdang tepila

sentong agiogo.

Iba sentong nung Nagaland Dy. CM, Y. Patton; Watsü Mungdang tir Tianaro Jamir; Ao Kakershir Mungdang (AKM) tir Lanutoshi Aier; All Ward Union Mokokchung Town tatongi tir Ati Mongro nungeri asü pila o tatsütsü jembir aser asür kinunger tenüing nung par jabaso tambusang Ajungba Imchen-i shilem agia liasü.

Mokokchung District Administration tenüing nung Deputy Commissioner C Ajit Kumar Verma IAS-i asüku lemsatepba ka menden Rev. Temsuwati-i telok dang zünga metetdaksü.

Iba sentong nung lenir nem aküm agüja temeimer nisung aika adenshia mang yimtsü. Police point nung sentong temer külen par ki Mongsenbai ward nung mapang tatsüka anenzüker pa mang par tasoyim Mangmetong-i bener ao.

Lenir mang yim tonga Ao Senden ketdangsürtemi anir aküm keta meiner ao. 13th November, 2025 anepdang 10:00 ako nungi tenzüka par yimdak asü pila sentong ayongzüka lir.

ENGOA-i kümdangtsü metetdaksür

Dimapur, November 12, 2025 (TYO): Eastern Nagaland Gazetted Officers' Association (ENGOA)-i parnok President Dr. Anungla Imdong Phom tenüing menüktsüba atema ozüingi melaba ama tapet mapa inyaktsü metetdaksüogo.

Tawa IAS nung Non-SCS officers aniokba ken o dak sendakba nung parnoki iba sangdong agütsü.

IAS ya All India Service ka lir aser lateta aliba DoPT framework aser UPSC procedure den liromedema inyaker. Ajisüaka kija aser telok kari inyakym tai belensa tenüing menüktsüba atema mepelar.

Tim inyakym ajanga Dr. Anungla Imdong Phom ya candidate ka ama shimtet

aser iba nung la dak tai kecha mali. Ajisüaka social aser print media sabangtem nung kuli tejangja memeteti la tenüing menüktsüba aser sensamatsüba ya tim masü aser ozüingia memelar ta ENGOA-isa metetdaksüogo.

ENGOA-isa kija mesüra telok kari danga print, electronic, mesüra social platforms nung kuli tejangja melii ozü züngsem kar danga mezügmeshira ozüingi melaba ama tapet mapa inyaktsü metetdaksüogo.

ENGOA-i Eastern Nagaland nungi ketdangsürtemi kümsüka ayutsü atema inyaker aser nübor ajak dang kuli melii kijatem anema mesüra telemsa adoktsüsa mapatem meinyaktsü nenshir ta parnokisa ashi.

T.R.Zeliang-i Naga customary system kümsüka ayutsü ayongzüik

Dimapur, November 12, 2025 (TYO): Deputy Chief Minister T.R. Zeliang-i village council tem dang Naga customary system kümsüka ayutsü ayongzüikogo.

Peren district kübok Jalukiejangdi village council hall lapoktsüdang T.R. Zeliang-i iba tayongzüka agütsü.

Naga nunger shiai pei pei customary laws aser inyangsangshi meteta alitsüla. Nagaland ajungalen tiptema

benshitsü atema customary laws tapet ka yanglutsü nüngdaker ta pai ashi.

Indian Constitution nung Arrla 371 A ajanga asenok Naga nunger nem customary laws benshitsü temeten agütsür saka item ozüingtem samaa aotsüsa tia ka nung lir ta Zeliang-isa ashi.

"Anungji Naga nungeri customary system ya asenok libaliro nung bendenloka benshitsüla aser alima tsüngdang

asen maitsü balaka sayutsü nüngdaker. Naga customary system ya Indian judiciary system ama tebenja masü, tezüpa saka temeten agütsür. Asen sobaliba ozüingtem ajanga mapang shitak nung mapa inyakteter aser senotsü aika meindoker" ta T.R. Zeliang-isa metetdaksü.

Paisa nübortem dang tarutsü putu atema ali aser ali rongsen kümsüka ayutsü ayongzüik.

Foothills Road yangludak sema senzütsü

Dimapur, November 12, 2025 (TYO): Wokha District kübok Baghty Division nung Foothills Road yangluba tesemtem repringdanga senzütsü.

November 15, 2025 nü Lotha HOHO aser parnok kübok aliba teloktem dena joint inspection team kati Baghty Division nung Work Orders 8 aliba tesemtem nung mapa inyakba repringdangtsü.

Iba telok nung NPWD (Road & Bridge), contractor firms aser media fraternity adentsü.

Iba joint inspection team ya Dimapur nungi anepdang 7:00 ako nung apusotsü aser Merapani Village nung anepdang 9:00 ako nung senteptsü. Idakji mapang sensaksem mapang tatsüka aliba sülen mapa inyakba tesemtem sema orr Old Ralan ajanga

Hovekhu-Niuland nung tembangtsü.

Anüngdang 12:00 ako nungi 1:00 ako tsüngda Hayiyan Village nung chiyungtsü ta Media Cell, NFHRCC-i sangdong ka nung ashi.

Iba nung bangdak Department aser contractor firms-i amalitepa yariteptsü ayongzüker ta NFHRCC-isa metetdaksüogo.

IMDH Mokokchung staff atema ananü workshop ayongzük



Dr. Ademla Tinu, MS, IMDH, Mokokchung, shisalen sayur aser Workshop nung shilem agirtem noksa nung angur.

Dimapur, Yimpoksüi/Nov. 12 (TYO): Dr. Imkongliba Memorial District Hospital (IMDH), Mokokchung ajanga Eagle Crest Training Academy and Consultancy, Dimapur den lungjemer "United In Purpose, Caring Beyond Duty" omen kübok Multipurpose Hall, IMDH, Mokokchung nung anogo ana atema workshop November 11-12, 2025 anogotem ayongzüka liasü.

Shiranger anepaluba yimya tajungba kumdahtsüsü aser team telungjem tashi itshidakhtsüsü nükjidong nung iba sentong ya ayongzüka liasü. Iba workshop nungya clinical, administrative aser support teams densema mozüki nung shiranger den yariteper ajunga dena liasü.

Dr. Ademla Tinu, Medical Superintendent, IMDH ajanga iba workshop ayongzükbä nükjidong lemsatepdang, "Jilajitongba nung tapok

adokdahtsüba ajanga health care inyakyim ajunga nung metokmeperi alir, shirangertem temulung masür aser shirangertem timtem ajurur," ta ashi.

Workshop ya jembishinü yimya tajungba kumdahtsüba kisüing masü saka health care nung inyaker temi jembishinüba, temeim sayuba, anepaluba, akumtsübotepba aser teamwork tajungba kumdahtsüsü asoshi lir ta lai ashi.

Allin Awomi, Operations Head & HR, ECTAAC ajanga sentong nung jembidang, state nung aliba Government Health Care facility nungbo ibai mezüingbuba alitsü, ta ashi.

Shisalen sayur Asheli, Aviation Trainer cum Trainer Team leader, ECTAAC aser Ayani Kikon, Soft Skill Trainer cum Editor-in-Chief nati shiranger anepaluba nung temulung agütsüba, jembishinü

yimya aser team work indang nung tesayuba balala agüja liasü.

IMDH Mokokchung ya state nung district hospitals tejentiba rongnung ka lir, kong Mokokchung district nung aliba nüburtem kisüing masü saka Longleng, Tuensang, Wokha aser Zunheboto district tem nungia shirangertem anepalur.

IMDH nungya 24x7 emergency services, General Medicine, General Surgery, Orthopaedics, Obstetrics & Gynaecologist, Paediatrics, Ophthalmology, Pathology (Lab & Blood Bank), Radiology, Anaesthesia, Radiotherapy, ENT, Physiotherapy & Rehabilitation, Dental, Ayush (Ayurveda, Homeopathy & Yoga) OST, ART, NCD, ICTC, ARSH, Dietician, 24X7 Citizens' Welfare Pharmacy, Dialysis, Mental Health Programme aser Oncology (Day Care) indang facilities lir.

Dimapur nung non-local nisung tasü mang ka nguteta lir

Dimapur, Yimpoksüi/Nov. 12 (TYO): Mejangjaba non-local nisung tasü mang ka Power House Colony Burma Camp, Dimapur nung Christian Revival Church anasa nguteta lir ta Police Controk Dimapur nungi November 11, 2025 anepdang 5:45 ako nung telephone osang ka aru.

Osang anguba sülen duty nung aliba police temi iba tesemi arsangtepa ao aser arishi küm 50 shi tain non-local nisung ka

tasü mang ngutet, ta Dimapur Police sangdong ka ajanga ashi. Ozüing agi melaba maparen ajak inyakba sülen tasü mang ya PM examination aser jangjatsü atema District Hospital Dimapur Morgue nung bener oa lir.

Kibur/kinunger/tembar temi Officer-in-charge, East Police Station, Dimapur den Mobile No. 7085055020 ajanga tongteprateptsü ayongzüker, ta Dimapur Police sangdong ajanga ashi.

Mokokchung nung Health Camp ayongzük



Dimapur, Yimpoksüi/Nov. 12 (TYO): Sardar Vallabhbhai Patel sor küm 150 ajungba nungtem nung District Level Padyatra sentong nung shilem ka ama Department of Health & Family Welfare, Mokokchung ajanga MMC Complex, Mokokchung nung November 12, 2025 nü Health Camp ka ayongzüka liasü.

Iba Camp nung memenatepba tashidak atema nisung 104 tendanga mozü lema

agüja liasü.

October 31 nungi November 25, 2025 tashi District Level Padyatra nung shilem ka ama Health Department ajanga jila aser yimtsüingtem nung Health Camps pongu ayongzüksü.

Ano November 15 nü MMC Complex nung NCD Screening Camp ka ayongzüksü aser iba mapang iba complex nung shishilempar dak Blood Pressure, Diabetes, Anemia amala tendangtsü.

NHHDC Ltd. ajanga Handloom Exhibition ayongzüka lir



Prasielie Pienyu, Chairman, Nagaland Handloom & Handicrafts Development Corporation Ltd. ajanga November 12, 2025 nü Urban Haat, Dimapur nung Handloom Exhibition semzüksüba mapang tangokba noksa nung angur.

Dimapur, Yimpoksüi/Nov. 12 (TYO): Office of the Development Commissioner (Handlooms), Ministry of Textiles, Government of India, New Delhi teyari nung Nagaland Handloom & Handicrafts Development Corporation Ltd. ajanga Urban Haat, Dimapur nung Handloom Exhibition ka ayongzüka lir, koba November 11-24, 2025 anogotem alitsü.

Iba Exhibition nung Arunachal Pradesh, Assam aser Nagaland nungi district balala

nungi artisans aser südaker densema shilem agir kija aser telok 60 adenshia handloom, khadi aser handicraft oset balala sayur.

Er. Y. Lipongse Thongtsar, Managing Director, NHHDC Ltd. ajanga tayongzükbä o jembidang mapa ochishia temeim nung meranga inyaksü ayongzüka liasü.

Iba Expo ya ajanga market linkages agütsüsü aser artisans aser südaker rongsenketzüing tsütsü maongka tali agütsür.

Sentong nung tetushi

tesemdanger Prasielie Pienyu, Chairman, NHHDC Ltd. ajanga akhi alemli mapang nungi amshia aruba teka mapa wazüka ayutsü nungdaker ta ashi.

Office of the Development Commissioner (Handlooms), Ministry of Textiles, Government of India ajanga iba Expo sponsor asüba atema pai tenüngsang agütsü aser NHHDC Ltd. ajanga maneni handloom sector jenjang ajungketba atema pelaba lemsatepa liasü.

Lokti aser kijai Asür Imkong L. Imchen mang ayimer

Dimapur, Yimpoksüi/Nov. 12 (TYO): MLA & Advisor, Government of Nagaland, Imkong L. Imchen asüba osang angazüka kanga jashir, ta Tenyimi Union Nagaland (TUN) sangdong ka ajanga ashi.

Asür Imchen ya lenir tejen ka liasü, shibai Naga nungertem asoshi pa takum bendanga agütsü. Pa ya ochishir, temulung teladak, tetsübo maka, pai shidak ta angatetba nung ajang ajanga nokdakba aser nübur ajungtsü asoshi arendaka melie jembiba lenir ka liasü.

Pa asüba ya Nagaland asoshi lenir tajung ka samar asütsü. TUN-i mangyimer kibong den asükhü lemsateper aser pa tanüla teti tatem maka tesunep nung anisüngzükjang ta sarasademtsür, ta sangdong ajanga ashi.

Lenir Imkong L. Imchen tia makai asüba tejashi lemsateper, ta Tangkhul Hoho, Nagaland (THN) sangdong ka ajanga ashi.

Pa dak ajemalu, nendaka inyakba aser ajak den sako litetba yimyattem teti bilemtettsü.

Pa asüba ya Naga nunger ajunga asoshi takoksa tulu lir,

shibai 'Nagas without Borders' tangatetba nung telungjem asoshi yakyaka inyakba lenir ka liasü, ta THN-i ashi.

Naga nunger telungjem nung amanga aser iba atema pai kanga meranga inyakba ozü mulung nung teti alitsü, ta THN-isa ashi.

Okola Imkong L. Imchen ya lenir, tembar tajung aser kanga meraketa züingshiba takotet nübu ka liasü. Pai AKM aser Ao Senden asoshi bendanga agütsür inyakba ajanga nüburtemi pa jangja metet aser tesüba küm 25 tashi pai dangar dak alia state tenzükgoko, ta Minister, Rural Development & SIRD, Government of Nagaland, Metsubo Jamir-ia ashi.

Pai mangdang tulu yur nendaka department balala nung minister ka ama aser legislator ka ama inyaka aru.

Imkong L. Imchen asüba ya Nagaland asoshi jabaso tajung ka samaba den sako lir. Pa maliba lenla ajak nung metettsü. Mangyimer kibong den asükhü lemsateper aser parnok mulungjang nung anisüngzüker aser tesunep lidakjang ta sarasademtsür, ta Minister Metsubo Jamir-isa ashi.



November 12, 2025 nü Bhutan nung Bhutan Chuba, Jigme Khesar Namgyel Wangchuck, taoba mapang Chuba Jigme Singye Wangchuck aser Ato kilonser, Narendra Modi nunger 'Kalachakra empowerment' sentong nung adendang tangokba noksa nung angur.

Global Climate Risk Index nung India jenjang 9buba nung lir

New Delhi, Yimpoksüi/ November 12 (Agencies): Alima tzü-mopung dak sendakba lendong balala agi tamajungtiba kongshiba linük 10 rongnung India-a densema lir, ta Mongolbar aonung sayaba report tasen ka ajanga metetdaksü.

Iba report nungji tali atsükba, yipru aser tzümetsüing densema tzü-mopung dak sendakba lendong balala agi linük aika kongshiba osang tejangja metetdakja liasü.

International Disaster Database (EM-DAT) indang data nung ajemdaker Germanwatch-i renemba Climate Risk Index, 2026 report ajanga ashiba agi, tesüiba küm 30 tsüngda tzü-mopung dak sendakba lendong balala nung nisung 8,30,000 dak tali süogo aser item lendong ajanga dollar sen trillion 4.5 takoksa nguogo. Tesüiba küm 30 tsüngda tzü-

mopung dak sendakba lendong agi tamajungtiba kongshiba linük asemji Dominica, Myanmar aser Honduras lir. Iba Index top 10 nung aliba linük ajakji global south nungi dang lir aser top 30 nungbo Europe nung aliba linük pongu aser United States densema lir.

Tang alima nung nütsüing shilem 40 bo (billion 3 dak tali) tzü-mopung dak sendakba lendong balala agi kanga mejungi kongshiba linük 11 nung alirtem lir, ta report nung shia lir.

Iba Index nung India jenjang 9buba nung lir aser China jenjang 11buba nung lir.

Iba Index nung Libya jenjang 4buba nung lir, Haiti jenjang 5buba, Philippines jenjang 6buba aser Kalmaegi & Fung-wong jenjang 7buba nung lir. Iba Index nung France jenjang 12buba nung lir, Italy jenjang 16buba aser US jenjang 18buba nung lir.

Climate Risk Index renemer rongnung ka, Laura Schäfer-i, "1995 küm nungi 2024 küm tashi nung tzü-mopung dak sendakba lendong 9,700 ben atalok aser item lendong nung nisung 8,30,000 dak tali asü aser dollar sen trillion 4.5 dak tali takoksa angu. Meimchirtem atema lendong tamajungbaji tali atsükba aser yirpu lendong lir," ta metetdaksü.

L a u r a - i s a , "Rongsenkettsüing tsütsü takoksa tulutiba aludaktsüba lendongji yirpu lir aser nisung teimba samadaktsüba lendongji tzümetsüing lir," ta metetdaksü. "Talisa India, Haiti aser Philippines ama linüktem nung tzümetsüing aser yipru ama lendong kanga bulua ataloker," ta iba Index co-author, Vera Künzel-i metetdaksü.

Hombarnü Brazil kübok Belem yimti nung global climate summit COP30 tenzüka liasü.

Parl' Panel nung Red Fort lendong atema jembitsü memelung

New Delhi, Yimpoksüi/ November 12 (Agencies): Bodhbarnü Parliamentary Standing Committee on Home Affairs senden nung züngsem kati Red Fort anasa gari nung bomb sashia apokba tatalokba onük benoka o lemteptsü benok, ajisüaka chairperson-i memelung, ta osang ka ajanga metetdaksü.

Senden nungji Trinamool Congress nungi MP kati Red Fort anasa atalokba onük nung o lemteptsü benok aser iba lendong ya intelligence

tamakok agi liasü, ta ashi.

Ajisüaka Chairman, Radha Mohan Das Agrawal-i iba onük nungji o lemteptsü memelung.

Bodhbarnü Parliamentary Standing Committee on Home Affairs senden nung 'Disaster Management' atema jembia liasü.

Iba senden nungji Ministry of Home Affairs, National Disaster Management Authority (NDMA), National Institute of Disaster Management (NIDM), National Disaster Response

Force (NDRF) aser Directorate General (Fire Services, Civil Defence & Home Guards)-i iba onük nung osang metetdaksüba den külemi tebilemba onük kar benoka liasü.

Hombar aonung Delhi nung Red Fort traffic signal anasa gari ka nung bomb sashia apokba sülen anasa aliba gari aika nung mi eploka arong. Iba lendong nungji nisung 13 süogo.

Bodhbarnü Ato kilonser Narendra Modi-i LNJP Hospital semdanga iba lendong nung yirur treatment agirtem ajurua jembiogo.



November 12, 2025 nü Jammu & Kashmir kübok Kulgam nung security sepaitemi Jamaat-e-Islami (Jel) anema operation aodang ki ka mita repringba noksa nung angur.

Supreme Court-i SIR dak sendakba nung EC dang telangzüba meshir

New Delhi, November 12 (Agencies): Bihar nung electoral roll yanglushitsü atema Special Intensive Revision (SIR) agiba ama Election Commission-i linük tesem ajaklen SIR agitsü sangdongba anema yimtenren party aikati Supreme Court nung ken o benoka lir.

Item temepishiba ken o angadangba mapang nung Supreme Court-i Election Commission dang SIR dak sendakba nung telangzüba agüjang, ta tuyuogo.

Supreme Court-isa high courts dang SIR dak sendakba ken otem mangadangi atatsü tuyuogo.

Supreme Court-i iba ken o nung telemtetba magi tashi high courts-i iba dak sendakba ken otem mangadangi atatsüla, ta metetdaksü.

Justices- Surya Kant aser Joymalya Bagchi nati akümba bench-i Election Commission dang Association for Democratic Reforms (ADR)-i agütsüba affidavit dak sendakba nung telangzüba agüjang, ta tuyu.

Item ken o angadangba mapang nung Justice Kant-i, kechiba temepishiba ken o agütsürtemi SIR ya tsübur? ta asüingdanga liasü.

DMK party tenüing nung ken o jembitsür senior advocate-i, "SIR exercise ya ita ka kija nung renemtsü atema Election Commission-i telemtetba agiba atema onoki tebilemstü akar, kechiyong ita ka tsüngda iba exercise ya kanga aritepa agiba ajanga voters tenüing aika agientsü," ta ashi.

Hombarnüa Bengal Congress Committee, CPM Tamil Nadu unit state secretary, P. Shanmugam aser Trinamool Congress MP Dola Sen nungeri SIR anema temepishiba ken o

balala Supreme Court matsüingdang benokogo.

Ajisüaka Shanmugam-i, "Ni SIR ya anema nokdaker masü saka iba exercise agitsü atema Election Commission-i mapang tatsüka dang latetba ya ashishir," ta metetdaksü.

Ano Tamil Nadu nung Opposition AIADMK-ibo SIR pusema temepishiba shidi agütsü.

AIADMK-i dang SIR pusema court nem temepishiba agütsü. Tamil Nadu nung taila voters tenüing aika züngoka lir, anungji SIR exercise ya agitsüla, ta AIADMK-i metetdaksü.

Linük nung sensotem maittsü jangjatsü atema Election Commission-i tashi amshiba ashishia ADR tenüing nung ken o jembitsür advocate Prashant Bhushan-i, taila voters maittsü jangjatsü atema Election Commission-i "de-duplication software" amshitsüla, ta ashi.

Paisa, enumeration form agütsür voters nem election c o m m i s s i o n - i acknowledgement slips agütsütsüla, saka commission-i yamaji meinyaker, ta ashi.

Iba sülen bench-i election commission dang Association for Democratic Reforms (ADR)-i benokba ken otem dak sendakba nung telangzüba agüjang, ta tuyu.

October ita tatembanglen EC-i states aser union territories 12 nung SIR exercise tenzüktsü osang sangdonga liasü.

SIR exercise atema tamalen EC-i State Election Commissioners 36 den senden mena linük tesem ajak nung SIR mapatong atema telemtetba agia liasü.

SIR shilem tanabuba kübok Tamil Nadu, West Bengal, Kerala, Assam aser UT of Puducherry densema state 12 nung SIR mapatong tenzüktsü, ta EC-i metetdaksüogo.

State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

Appendix - IV - A
[See Proviso to Rule 8(6)]
KIOJEN AYOKTSÜ SANGDONG
Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 8 (6) nung ajemdaker E-Auction ajanga kiojen ayoktsü sangdonger. Public, talisa sen apur(tem)/senmanger(tem)/Guarantor(tem) dang ya sangdonger, tsünglanglen shia aliba aser Secured Creditor "State Bank of India, SARB Jorhat" dang mortgage süa aliba kiojen ya State Bank of India nung Authorised Officer-i agiadokogo, aser iba kiojen ya M/s Eastern Enterprise and Sons, Proprietor Mr. N R Zeliang aser Guarantor Mrs. Heilam Zeliang dang nungi sentsüh **30.03.23 anogo tashi nung Rs. 2,11,25,425.65 (Rupees Two Crores Eleven Lakhs Twenty Five Thousand Four Hundred Twenty Five and Sixty Five Paise only)** aser **31.03.2023** anogo nungi sen tetemlok aser incidental expenses, costs, etc alangzüktsü atema "Kong koma ali", "Koma lidir yamaji" aser "Yangji aliba ajak" basis nung **24.12.2025** anogo nung ayoktsü. Reserve price ji **Rs. 2,10,00,000.00 (Rupees Two Crores Ten Lakhs only)** aser **earnest money deposit ji Rs. 21,00,000.00/- (Rupees Twenty One Lakhs only)** asütsü.

Kiojen osang tongmelang agi
Property ID : SBIN400007894124
Block No 11, Mouza no 1, Ward no 4, Walford Colony, Burma Camp, Dimapur, Nagaland nung Mr. N R Zeliang tenüing nung aliba kimong aser yangji aliba ajak den RCC building, tasazükji 00B - 02K - 08L lir aser Dag no. 64/1053, Periodic Patta no 900 lir.

Artsü:- North tsütsülen- Kibur kimong, South tsütsülen - Approach Road/ Cachari Church, East tsütsülen - Namkiewa'er kimong aser West tsütsülen- Smti. Llunglung'er kimong.

Kiojen ayoktsü telatetbatem osang tejangja atema yangi repringang, State Bank of India indang link, secured Creditors website: <https://sbi.co.in/web/sbi-in-the-news/auction-notices/sarfaesi-and-othershttps://baanknet.com/>

SBI Website	E Auction Website	Photographs

Date: 11.11.2025
Place: SARB, Jorhat

Authorised Officer



TIR YIMYIM YIMOBILEM (EDITRIAL)

DIMAPUR THURSDAY, NOVEMBER (YIMPOKSÜI) 13, 2025

Khen bendanga agütsüshidi !

Nagaland-bo tajung ser nung Nagaland nung alir nisungtem majungba agi Nagaland kanga mejungi kümogo. Anungji, Nagaland topur ajung ano tanaben shia arudaktsütsü asoshi Naga nung ajak pei pei mapa nung bendanga agütsüshitsü tanü tensa agi akanger. Ano, Naga nungersa rongnunga asenok Aotsür Aortemi tama anir pei lima aser nübortem asoshi teindang shisatsü tener ochishia aser nendaka inyaktsü asoshi peisasa Tsüngrem den tezüngzüktep ka agitsü kanga nüngdaka kümogo. Atangji, pei lima yanglushitsü nüngdakba indang jembidang, teraksa nung denerbo malitsü, anungji kati ka aitsüteptsü aser ano teyanglushitsü jembidanga tama sünerbo malitsü, kechiyong nisung asoshi “ni tai, anungji ni yanglushidi” ta nangzüksüji temela masü. Ajisüaka, alima raksaa yur tai nangzüker melira teyanglushir a malitsü. Aji oda, nisungbo ajak shitak aser teindang saka alima-ang majung tabo mesütettsü. Anungji, asen kini anir Naga nung ajungai Nagaland majungba ya “ni tai, onok tai”, anungji onoki anir yanglushitsü ta yimjak nung odia Tsüngremia aser nisungia angashia yimyim ayimtsü kanga nüngdaker. Atangji, Nagaland yanglushitsü nüngdakba indang jembiba ya gari lenmang majungba yanglushitsü indang jembir masü mesüra nübortem nüngdakba mozü ki aser kaketrejute yanglushitsü indang jembir masü, saka pei taküm jakla, shisatsü aser inyakyim melenshitsü nüngdakba indang jembir. Tangbo asenoki asenok memelenshi ser lenmang-ang yanglushipet yanglushir saka majunger, asenok temulungjang shisatsü aser teka memerüktet ser asenoki mozü kitem aser kaketrejute yanglushitsü meranger saka tamajungba-ang akümer, ibaji asenoki tesü inyaktsüba tama aser tama inyaktsüla tesü ta langkoshishi mesor amai inyakba ajanga majunger. Asen lima yanglushitsüba mapaji asen taküm dak nungi tenzüksüla. Shin o nung, “temeim mapaji pei kidang nungi tenzüker”, ta ashi ama, pei lima, pei yimten, pei lokti aser pei arogo yanglushitsübaji pei taküm nungi tenzüksüla. Aji oda, yimten nung yimsüsürüa “tang nungi ni joko ochishia nübortem asoshi timtem takoksa arema inyaktsü”, ta nangzüka peisasa bendanga agütsüshitsüla. Kasaji, lokti aser arogo nung tenzükertemia “joko tang nungibo ni ochishia aser nendaka Tsüngrem aser nübortem tenzüksü ta peisasa tenangzüka agitsüla. Ano, nübortem rongnunga nisung shiai “ni tang nungibo mapa ajak nung indangindanga inyaktsü aser ochishia alitsü,” ta peisasa Tsüngrem tenüng nung tenangzüka agitsüla. Iba ama pei lima yanglushitsü asoshi asen taküm bendanga agütsüshitsü atema arogoi ayongba ama revival sentong tulu ayongzüksü menügdaker, mesüra government-i küm shia Vigilance Week ayongzüka akaba agia meyanglushitettsü, kechiyong Vigilance Week nung yimten yimsüsür aser ketdangsertemi anir nisung ajaki pei mapa nung ochishia alitsü nangzüka agi Nagaland ochishia akümtsü asübo alemli kümer lila. Ajisüaka, Nagaland nungbo revival hour ka lili, yimten o arogo na toktepa tamajungba aser ochimashiba kümli, Vigilance Week ka mongli ano yimten o lokti nung ochimashi tuluba beshili ta Nagaland yanglushitsü asoshibo anasaia marur. Ibaji asen taküm aser asen jakla meyanglushi ser tema tazütsü agi revival nung adenba aser Vigilance Week nung ochishia alitsü aser ochimashi anema raratsü nangzüka ajanga lir. Joko, asenok yimten nung alirtema ochimashi mapa inyakba agi alaktsüla aser arogo nung alirtema aktsüla. Aji oda, yimten yimsüsürtema ayongdener, “arung, joko asenoka ochishia lidi,” ta kati ka ajungshitepa pei jakla yimya aser pei lima yanglushi tenzüksüla. Kasaji lokti nung lenirtema ayongdener, “arung, asenokang magi aser machi aremer ochishia nübortem asoshi inyak tenzükti,” ta tenangzüktepba ka agir asen lima yanglushi tenzüksüla. Aji oda, nübortemia joko asenoka indangindang lidi, meinyakba rongsenbo pei yangku nunga meinokli aser pei kidanga mebenketli ta peisasa pei taküm aser kibong bendanga agütsüshiba tenangzüka ka Tsüngrem tenüng nung agitsüla. Asenok alima nung khi alitsüba purtem, asenoka kopiga ochimashi alitsüka ? Bilemdangdi !

OLEMSABANG

TSÜNGREM TENZÜKTSÜ TAJABA BALALA

~ L. Kika Pongener.

(Yashi adok nungi...)

Tasembuba nung mapang tataktet ka atema tenzüksü shimertemji arogo nung deacon, mapangsur aser tela-tenuk balala nung tenzükertem ya asütsü. Item tenzükertem ya-a taküm piyong bendanga tenzüksü ajaba, mesura taa/itasen agütsür toklana tenzüksü ajaba masü; saka mapang tataktet ka tenzüksü atema shimtetba ta angateter. Yirusalem nung mezüng arogo tenzüka aodang....Tenyartemi Tsüngrem o sayuba mapang, amitsürtem chiyungtsü agi mataba mechi nungsen adok. Yongji, tenyartemi Tsüngrem o sayuba mapang, anganutsü atema Deacon tenet shimtetba angur..... "Aser ter ana jagi nutsüng telok parnok dangi jar ashi; Asenoki chiyungtsü anganutsü asoshi Tsüngrem o sentoktsü tim masü. Anungji tenung tajung akaba aser Tanela agi asüngba shisa akar nisung tenet, shir asenoki iba mapa reprangtsü asoshi shimtettsü nenok rongnung bushiang" (T.Mapa-6:2-3). Tanübo tensa den apet Deacon dang masü; Ministry, Committee, Board aser tela-tenuk balala nung tenzüksü aika shimer. Anungji tenzüker ajaki pei nem nunglotsüba mapa ajak nung nuburi temulung lemtettsüsa; ochishia ketdangsua tenzüksüla.

Ano item dak alaka, Tsüngremi sempet balala agütsürtem....Shiner, mangdang, taneptsüba sempet aser tanela pusemertem; item tenzüker ya-a mapang balala nung, nungloktsüba mapa inyaktsü shimtet ta angateter. Yisu-i nutsüng ter-ana (12) liaka; ano tangar nutsüng neter (70) shimteter; parnok ana-na lemsar yokba angur (Luke-10:1-12). Parnok ya-a taa/itasen agütsür toklana tenzüksü ajaba masü; saka tensa balala nung Tsüngrem'er o tongdar asütsü shimtet ta angateter. Anungji Tsüngremi koba tesem nung kechi mapa nungloktsüdir; tashi anga-a tulur-tilar; takar-sensaker; aser tanak-temesung mebendangi; nungdakbapur ajak yaritsü tangatetba alitsüla. Aseni bilemba agi Tsüngrem'er shinba o mekümdaktsütsüla; aser asen dak tangar memettsüdaktsüsa; tebang-temeli kanga azüoka kuli asütsüla. Ajak dang alia, rongsen penbur tenzüker masütsüla.

Jokorla, tanübo asen lima nung; laishir lai poti meteter takotet; M.Th., Doctorate aika adokogo aser Reverend-a aikasa kümogo; mungdang aser lim arogotem nung toklang tenzüker zünger-mezüngmai kümogo; Tanela sempet akar/Tanela pusemer aika kümogo; aser arogopurtema laishir mesuaka tamangdir sayutsüngir/tesayur aika adokogo. Ajisuaka, kanga tesasatsüka, alimabo akhidang laishir, sayutsüngir, tanela pusemer aser Reverend aika maliba mapang dang nungi tanü kanga tamajungba kümogo. Arogotem ketdangsuba mapa nung nuburi tamang makatettsüsa; mungdang inyakyim nunga nubur mulung masütsüsa; reprangtetdang kanga sasa-a bilemer. Tsüngrem tenzüker ajaki arogo aser mungdang tenzüka ya; tamaren menden ka ama mekümdaktsütsüla. Arogo aser mungdang nung tenzüka ya pei ajangzüksü bushiba luyim ka ama mekümdaktsütsüla. Tenzüker ajaki arogo aser mungdang madak kibur küma masü, saka tsüzüng-ozüng tazüokba inyakyim küpok lia; ajemalua tila kümer; ochishia bendanga agüja tenzüksüla. Tenzüker ajaki nuburi tetla-tetshitsüsa masü; saka akümtsübuttsüsa tenzüksü ajungshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Florida nung tayimtsü tsükokba lendong nung missionary ka asü



Missionary Alexander Wurm aser par jala Serena Wurm na noksa nung angur, Ajichilen tayimtsü tsükokba tesem angur.

November 12, 2025: Missionary ka aser par jala na tayimtsü tilaka nung Jamaica-i relief mission atema aoba mapang nung South Florida nung tsükok, aser iba lendong nung tenaprongla asü, ta osang ka ajanga metetdaksü.

Khristan ministry organization 'Ignite the Fire' teloki, Hombarnep tayimtsü tsükokba lendong nung asür anaji ministry tentetsang arrshi küm 53, Alexander Wurm aser par jala Serena Wurm (22) na lir, ta metetdaksü.

Tawa Jamaica nung Melissa yipru mopung lendong tuluka atalokba sülen Khristan melungtet telok aikati iba yipru agi kongshiba nüburtem nem teyari agütsüdar.

Missionary Wurm aser par jala nati Jamaica-i teyari balala bener otsüba mapang nung iba lendong ya atalok. Tena mena aliba Beechcraft King Air tayimtsüji Coral Springs kübok Fort Lauderdale kiyong nung aliba tzübo ka nung tsükoka liasü.

Ignite the Fire organization yagi Caribbean nung mission aser evangelism ajanga lanurtem nem tashi agütsür aser Wurm'er kibongi temeim mapa inyaksü kanga janrar, ta organization indang website nung shia lir.

"Parnok akumli wadang tembangbaji-a pei asoshi mebilemi tasü itta temeim mapa inyakba mapang nung liasü, iba ya ajanga asenok dang nübur tenzüksü aser meimtsü nenshia metetdaksür. Tesünep nung anisüngzükgang, Alexander aser Serena. Nenok tesangwa ajanga nenoki melenshitsüba nisungtem dak maneni ayatsü," ta ministry-i lemsatep.

Tawa Alexander Wurm-i Crisis Response International den yaritepa medical supplies, tzü filters aser StarLink satellite internet osettem Jamaica-i bener oja liasü.

Crisis Response International tentetsang, Sean Malone-i, "Caribbean nung aliba linüktem atema Alexander dak mangdang tulu liasü. Iba yipru

lendong atalokba sülen pai timtemba nüburtem yaritsü atema marendak, aser pai akokba tashi inyaker," ta metetdaksü.

"Pai teyari balala bener otsüba ajanga nisung aikati anisüngzükg angu. Pai taküm aika kümüzük aser pai pa taküm bendanga agütsüogo," ta Malone-isa metetdaksü.

Missionary Alexander Wurm aser par jala na Hombarnep 10:14 ako nung Fort Lauderdale Executive Airport nungi apusoba sülen mapang tatsüka tsüngda tayimtsüji tsükoka liasü.

Osang angazükba agi, Caribbean nung missionary mapa inyakdang amshitsü asoshi Alexander Wurm-i tawa tayimtsüji alizüka liasü.

November 2 nü ang Wurm-i social media ajanga yamai lemsatepa liasü, "2005 küm nungi ni pilot ka lir. Caribbean nung nüburtem moatsütsü süra Ignite ministry ket nung missions tayimtsü ka alitsü nüngdak, ta ni apiteta liasü."

China nung ketdangsertemi house church nung lenir asem apu

November 12, 2025: Central China kübok Xi'an nung aliba house church ka nung lenir asem sorkar ketdangsertemi tanaben puogo.

Taoba Amongnü Xi'an Municipal Public Security Bureau nungi ketdangsertemi Pastor Lian Xuliang, pastor Lian Changnian aser Arogo nung züngsem Fu Juan nunger apu, ta yimsü temeden atema inyakba melungtet telok ChinaAid-i metetdaksü.

Baqiao District Court-i temelaba agütsüba sülen Khristan lenirtemji apu, aser tang par asemprong Weiyang District Detention Center nung puoka lir.

2022 küm August ita nunga par asem pua liasü. Küm asem jungnüa tepuokdak ayuba sülen taküm April ita nunga parnok bail nung chioka liasü.

Arrshi küm 71 Pastor Lian Changnian bo temang kanga majung aser medical treatment tagidak liasü.

"Iba ken o ya taküm July 9

nü angadang, ajisüaka tang tashi obendang magütsür," ta Church of Abundance (Fengsheng Church)-i sangdong ka ajanga metetdaksü.

"Iba obendang ataba mapang nung ketdangsertemi maneni par asemprong pua tepuokdak ayuba ya tim masü," ta Arogo metetdaksü.

Küm 30 tejaklen tentetba Church of Abundance ya 2022 küm August ita nung Xi'an Civil Affairs Bureau-i shibangja liasü. Iba kümji China Tir Xi Jinping tetuyuba nung ajemdaker linük nung register masüba Protestant Arogo aika shibangja liasü.

U.S. Commission on International Religious Freedom (USCIRF)-i, 2022 küm Khristan lenirtem apubaji linüki register masüba Arogotem anema inyakba lir, ta metetdaksü.

Khristan lenirtem jagi ashikülak mapa inyaker aser linük security anema inyaker, ta Khristan lenirtem nem tai

tongloksü.

China nung aliba House Churches-i tenla aser ter-shilem tenla bendener; sorkar ketdangsertemi ibaji ashikülak mapa ka ama züngshir.

Aibelen nangzükdaksütsü atema ketdangsertemi Pastor Lian Changnian reshikangshia liasü. Pastor Lian kinüngtsüi, Lian dak tenük nung azü atsünga liasü, teka waaker liasü aser yirütsüba tarak aika liasü, ta metetdaksü.

China nung Communist sorkari unregistered churches anema inyaker aser Protestant Arogotem dang sorkari melaba Three-Self Patriotic Movement nung adentsü rongshir, ta yimsü temeden atema inyakba melungtet telok, Bitter Winter-i metetdaksü.

Hopta ishika tejaklen-a Guangxi Province kübok Beihai nung Pastor Jin Mingri densema yimti balala nungi Zion Church nung züngsem 30 dak tali pua liasü.

ANO GO ABEN TSÜNGREM DEN

Kidang sayuba mapa - Tazüng 6:4-9

Senso ka kuma indaktsütsüba mapaji tepenja aser mapang talangka agia inyaktsüba mapa lir. Tsüngremi asenok nem inyakyim tejangja kar agüja lir ta asenoki bilemtettsüla. Iba inyakyimji Tsüngrem tsübuba Khristan kibong nung shidak inyaker.

Shingaia Pa memetetba sayutsü makok. Anungji Laishiba nung ozüngtem, ainkartemi jembiba aser inyakyim sayua alibaji tsüraburi tekolok aser temulungjang nung zünga ayutsüla.

Ano, ochi temetetbaji ochi shia amshitsüla. Tesayuba tajung nung tangatetba aser taküm tatishitsü anaprongla dena lir.

Ano Tsüngrem ochiba koba kibong nem agütsü iba jagi mulungsentsü aser taküm libaliro anaprongla azüokdaksütsü mesüra kija ser telok tesendaktep anaprongla nung sayutsüla.


Au, kidang tesayuba tajung agütsütsübbaji mapa tasak aser tayongzükbaji mapa ka lir. Aji asünung asenoki ibaji kümdanga inyaktsüla.

Item ya shisadangang: Tawa tanü kibong nung tebilemstü timtem lir ta nai amanger asü? Yamaji lira, kechi inyaktsü akok? Nai kechi inyaktsü akok? Nai kechi inyaker ?

O Kibuba, Ne telatet ozüng kü dang sayuangma; aser aji ni tatem tashi benshitsü.

Kibuba tajung aser tindang lir: anungji Pai temenen pur dang leman sayur.

Mohan Bhagwat-i India ya Hindu linük ta jembiba CBCI-i aitsür



Mohan Bhagwat

November 12, 2025: Tawa RSS tongti, Mohan Bhagwat-i, India ya 'Hindu linük' ta jembiba ya tai aser tashioksüba lir, ta Catholic Bishops' Conference of India (CBCI)-i aitsüogo.

November 10, 2025 nü New Delhi nung aliba CBCI Centre-i sangdong ka ajanga, RSS tongti leniri jembiba o ashishia meyiptsüogo.

November 9 nü Mohan Bhagwat-i, 'Bharat ya Hindu linük. Ibaji ajanga linük temzüng nung kecha timtem madoker. India nung ajaki India nunger sobaliba benshir, anungji Hindu nunger masüba nisung shinga mali," ta jembia liasü.

CBCI-i, "India nunger Khristantem-a Hindu ta jembibaji onoki magizüker. India nunger Khristantem ya nüma-tanga aliba India nungertem lir saka Hindu bo masü," ta metetdaksü.

CBCI-isa 2016 küm March 11 nü Supreme Court-i agtsüba

obendang ka metetdaksü.

Writ Petition (Civil) No. 203/ 2015 nung Supreme Court-i, India nüngja 'Hindustan' aser 'Hind' ta amshitsü mepishiba magizüki liasü.

"India ya Hindu linük, ta ashibaji CBCI-i magizüker. Iba dak alia India ya Hindu linük kümdaksütsü atema merangba maparen ajak onoki aitsür. India ya 'SOVEREIGN SOCIALIST SECULAR DEMOCRATIC REPUBLIC' ka liasü aser teti yamajisa alitsü," ta CBCI-i metetdaksü.

CBCI-isa India nunger ajak, talisa Khristantem dang India linük temzüng kümüzüka ayutsü atema inyaktsü ayongzükg.

CBCI-i, linük nüchiso atema raraba mapang nung India nung Khristantemi tongtibang shilem agiogo aser tang linük yangerba nunga Khristantemi shilem tajung agir aser maneni yamajisa inyaktsü, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tou**(adv)** meinyakdang aser magidang tokja aliba (remained afresh, untouched)

* Alu tou nung aonsutsü aika meyteta liasü.

Toushi**(adj)** timtem, tuokrong, tipmatem (suffering)

* Ozü kibong nung toushi mapang aiben ajuru.

OLONG PAITEP # 7328

1				2				3		4
5		6								
							7			
8										
										9
		10				11				
				12				13		
14										
						15				
16										

TIPLIN

2. Auonungchiyongsüasenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A ___ g

-(3)

6. Mopung apodoka

-

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S ___ k

-(3)

14. T ___ r

-(3)

OLONG PAITEP # 7327 TELANGZÜBA**TIPLIN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

China nung gari yangluba company FAW ajanga Guinness World Record ka ngutetogo. Parnoki yanglutetba gari Hongqi HS6 plug-in hybrid SUV ajanga mile 1,445 tashi oteta liasü aser iba atema "longest distance traveled on a single full charge and tank of fuel - without refueling" otsü tasen yangluogo.

October 30, 2025 nü Shangri-La nungi HS6 gari apusoba November 3 nü Guangzhou atong. Iba lenmang ya Kunming, Baise, aser Wuzhou yimtitem ajanga süi.

Seng Khasi küm 125 ajungba nüngtem nung nüngshilung 40 azüng

Shillong, November 12, 2025 (Agencies): Seng Khasi küm 125 buba ajungba nüngtem nung November 9, 2025 nü Lum Sohpetbneng nung nüngshilung 40 azüngogo.

Iba sentong ya Seng Khasi Kmie-i Seng Khasi aser Seih Raij unit tem den külemi ayongzük.

Seng Khasi ya 1899 nung asangur 16-i Shillong nung tentet. Parnoki Khasi Way of Life kümzüka ayutsü aser ajungkettsü nükjidong nung iba

telok tenteta liasü.

Tesüiba küm 125 tashi arudang Meghalaya kübok tesem balala nung Seng Khasi kongsang 300 tema tentetogo aser item telok ajaki Khasi sobaliba, külemküjabaren aser tangatetbatem kümzüka ayutsü meranger.

"Seng Khasi-i lisopur tangatetba aser maitsü kümzüka ayutsü atema tenangzük yur inyaka aruba atema tenüsang agütsür" ta Meghalaya Governor CH Vijayashankar-i ashi.

Iba sentong nung Deputy Chief Minister Prestone Tynsong, Art and Culture Minister Sanbor Shullai, aser Jowai, Nangbah o Myllem nungi lisopur lennirtem aser lokti teshimtet nübotem aden.

Lum Sohpetbneng ya Khasi nunger poktetdak ta züngshir aser iba ya parnok asoshi kanga tongtipang tesem ka lir.

Iba benjungmung ya November 23 nü Jaiaaw, Shillong nung aliba Weiking Ground nung 126 buba Seng Kut Snem nung tembangtsü.

Manipur nung Amur Falcons shikariba noktanger; Air gun**Imphal, November 12, 2025**

(Agencies): Manipur kübok Noney district nung yimtsüng 16 nung alirtem dang November 15 tashi nung air guns agütsütsü tetuyuba agütsüogo.

Noney district administration-i Amur Falcon dena ozütem shikariba, apuba mesüra metsüba tenokdangba agütsüogo.

Additional District Magistrate (ADM) Stiff Khapudang-i Hombarnü iba

tetuyuba agütsüogo.

Amur Falcon (Falco amurensis) dena migratory birds shikariba mesüra tepsetba ya Wildlife Protection Act, 1972 nung Sections 50 aser 51 kübok temerenshi aliba inyakyimtem lir ta pai ashi.

Noney district nung air guns amshiba noktanger aser nisungtemi pei pei yimtsüng ketdangpur ket nung air guns agütsütsü metetdaksür ta Additional District Magistrate-i shiogo.

Yimtsüng ketdangpurtemi air guns parnok ket nung ayutsü aser migratory birds mao tashi mesüra November 30, 2025 tashi koba tekaraba südir iba tashi ayutsüla ta tetuyuba nung shia lir.

ADM-ia yimtsüng ketdangpurtem dang November 15, 2025 tashi nung air guns bendenba osang agütsütsü metetdaksüogo aser tashi mangartem ozüng tapet agi merenshitsü tekümdangtsü shiogo.

Mizoram-i tourist kanga arur; Ita 2 nung lakh 1.27 tema aru**Aizawl, November 12, 2025**

(Agencies): Mizoram nung taküm August aser September tsüngda tourists lakh 1.27 tema aruogo ta Tourism Department-i metetdaksü.

Ita ana nung tourists 1,27,458 aruba nungi local aser domestic visitors 1,25,250 liasü aser bendanger tourist 2,208 liasü ta parnoki ashi.

September kija district 11 kübok accommodation units

128-i tourist arrivals indang reports agütsü. Iba nung Aizawl District nung teimtiba aru aser ita ana nung accommodation units 59-i foreign tourists 112 aruba shia lir.

Lawngtlai District nunga international tourist aika aru. Mizoram-i August ita foreign tourists 1,250 aser September nung 407 aru aser parnok teimbaka Myanmar kübok Rakhine State nungi liasü ta

department-i metetdaksüogo.

Taru-tao tongtipang tesemtemji Lengpui Airport (ILP counter), Mamit District nung Security FRO aser Kanhmun, Bairabi, o Vairengte border points ajanga liasü.

Iba mapang Mizoram semdangi arur foreign tourist teimbaka Myanmar, Israel, Japan aser United States nungi liasü ta Tourism Department-isa ashi.



Young Mizo Association (YMA) nung Central Coordination Committee (CCC) ajanga Central YMA Hall, Tuikhuahtlang nung 104 buba senden ayonga amendang agiba noksa ka angur. Iba senden nung Central YMA President R. Lalingheta menden liasü aser Mizoram kübok tesem balala nungi züngsem 248 aden. Senden nung YMA CCC-i permit melii non-locals-i shishilembaba azüoktsü, Mizo tsürtem non-Mizo nunger den kibong makümtsü atema awareness campaigns agitsü, Mizo saisapongtem asentenshitsü aser Mizoram nung Zo nunger sub-tribes tsüngda telongjem adokdaksütsü bangzüngtem renemogo.

Army tayimtsü tsükokba nung sepai 20 prongla süogo: Turkiye

Ankara, Yimpoksüi/Nov. 12 (Agencies): Azerbaijan den arütsü anasa Georgia nung Turkish C-130 military cargo aircraft tsükokba nung yangji mena alir sepai 20 prongla süogo, ta Turkish Ministry of National Defence-i ashi aser bushisüngdangar tem iba lendong atalokba tesem nung adenshia lendong adokdaksüba tera asadanger.

Tayimtsü ya Azerbaijan indang Ganja yimti nungi ayamesoba sülen tsükoker anogo ka lir iba osang tejangja ya Bodhbarnü sangdong.

"Asen sepaitem linük asoshi takum bendanga agütsüogo," ta Defence Minister Yasar Guler-i social media post ka nung ashi, kong sepaitem uniforms nung tangoka aliba noksa tem dena liasü.

Georgia ketdangsürtem den teka amteper Turkish investigators temi Georgia nung Kakheti district kübok Sighnaghi municipality nung

tayimtsü tsükokdak Bodhbarnep tayimtsü teraksa reprangshim tenzükogo ta ministry ajanga ashi.

Ibai 2020 sülen Turkiye nung mitkar lendong tesashitiba alitsü, koba Georgian-Azerbaijan arütsü nungi kilometer pongu shi pilar atalok.

Georgia indang Sakaeronavigatsia air traffic control service ajanga ashiba agi, tayimtsü ya linük indang airspace telungi aitba sülen radar nungi sama aser timtem ajuruba osanga kecha me yok.

Iba tayimtsü ali nung tsükba sülen anüngleni mokozi tanak tuluka atu aser tayimtsü teraksa ya ali tesem balala nung merephsia liasü.

Turkiye Tir Recep Tayyip Erdogan-i asükhu lemsatep aser kanga jashir ta shia liasü.

Turkiye aser Azerbaijan ya rongsenketzüng aser sobaliba tsütsü tesendaktep takang lir aser mitkar tsütsüa yamaji

tesendaktep tajung lir, kong Ankara-i Azerbaijan sepaitem nem training agütsür aser Baku nem nok-nüa agütsür.

November 8 nü Baku nung Victory Day amungba nung Erdogan aser Turkeyi ketdangsürtem dena liasü, koba 2020 küm Nagorno-Karabakh region nung Azerbaijan-i Armenia madak tongpang nung takok anguba temaitsü lir.

Mongulbarnü tayimtsü lendong ajuruba sülen Azerbaijan, Georgia, Kazakhstan, Qatar, Egypt, Iran, Italy aser Malta densema linük balala nungi lenirtemi asükhu lemsatepa liasü.

C-130 Hercules tayimtsü ya US firm Lockheed Martin-i yanglur aser iba tayimtsü ya four-engine, turboprop transport aircraft lir, koba alima tesem balala nung mitkar temi sepaitem, cargo aser danga osettsüset belenba nung kanga amshir.

Trump-i Israel tir dang Netanyahu nem tatok agütsütsü asüngdangar



Tel Aviv, Yimpoksüi/Nov. 12 (Agencies): Bodhbarnü US Tir Donald Trump-i Israel Tir Isaac Herzog dang Ato Kilonser Benjamin Netanyahu nem tatok agütsütsü ajungshi, shiba ochimashi mapa inyakba ken o balala asem nung tang bushisüngdanga ken o jembiba mapang lir.

Herzog dangi shiti ka züluba nung, "Küm 3,000 shi meranga aruba yimjung külemi ajangzükteter aliba otsüsütsü mapang ka nung tongteprateper," ta Trump-i zülü.

Pai Israel tir dang Benjamin Netanyahu nem tatok ajak agütsütsü ayongzüik, shiba "War Time Prime Minister" tajung ka lir ta ashi.

"Ni Israeli Justice System kecha küboka maliba ni akumtsübor... Ajisüaka Bibi anema iba ken o ya yimtenren tsütsü nungi aser kuli tejangja makai ken o benokba lir ta ni amanger," ta Trump-i shiti nung ashi.

Netanyahu-i tang ken o tejembidak aliba nung aibelen mapa kecha meinyak ta shijen ashir, koba ano obendang magütsü lir. Pa bhukumer temi item ken o ya yimtenren tsütsü nungi benokba lir ta ashir.

Israel ato kilonser aser pa kinungtsü Sara nati 'political favours' atema billionaires nungi cigars, jewellery aser champagne densema sen \$260,000 dak tema indang sempet agizük ta ken o ka nung tai tonglokja lir. Ano danga ken o ana nung pai Israeli media outlets nungi pa bhukuma osang abentsü lenmang bushi ta ashir.

Herzog indang office-i Trump shiti nguogo ta shiogo aser Israel tiri Trump ya tematiba jenjang nung akhum agüja züngshir aser Trump-i masetshie Israel bhukumba atema maneni pelaba lemsateper ta ashi.

Ajisüaka Tiri tatok agütsüba aginer temi inyakyim renema aliba ama agütsütsüla, ta sangdong nung ashi.

Netanyahu indang tang kümsük ya 2022 küm tatemlen tenzük aser pai obendangba tsütsü temelenshi tulu benoktsü meranger, koba ajanga Israel indang courts tem tashi mait kumdaktsütsü tebilemba lir ta iba sentong anemer temi ashir. Item temelenshi mechi nüburtemi longkak ait tenzük, saka October 2023 nung Gaza rara tenzükba sülen anendaka lir.

Ukraine den yimjung ken o jembiba tenzükshitsü renema lir: Russia

Moscow, Yimpoksüi/Nov. 12 (Agencies): Istanbul nung Ukraine den yimjung ken o jembiba tenzükshitsü Russia renema lir, ta Russian Foreign Ministry nungi ketdangsür kati state news agency TASS dang ashi, anungji küm pezü tajunger raraba nung tangatettep kati arutsü teimla aliba sayur.

Linük ana nungi ketdangsürtem Turkiye yimti nung adenshia July 23 nü khen jembishinü akaba sülen tang tashi indang-indanga ajurutepa jembishinüba mali. July 23 nü senden ya minute 40 dang amen aser terenlok kecha makai tembang.

Turkiye ketdangsür temi Moscow aser Kyiv dang jembishinü tenzükshitsü maneni ajungshia arur, ta ministry nung second department for CIS countries director Alexei Polishchuk-li ashi.

"Iba atema Russia renema lir - aser ibai asangsang akumtsü Ukraine dak keta lir," ta Alexei Polishchuk-i ashi.

Ajisüaka yimjung ken o jembiba anendakba ya Kyiv mechi lir ta Moscow-i aitsüba Ukraine-i magizüker. Jembishinü tejangja metenzükdang occupied territories nungi Russian sepaitem ainshitsüla, ta Ukraine ketdangsür temi ashir.

July 23 nü senden nung Kyiv-i August ita Ukraine Tir Volodymyr Zelenskyy aser Russia Tir Vladimir Putin tsüngta senden amentsü onük benok, saka mapang tatsüka lir Russia leniri Moscow nung dang ajuruteptettsü ta Kremlin-i ashiba Kyiv-i magizük. Turkiye tetsüngtai ia yimjung ken o ano jembitsü mulunga aliba

lemsatepaka tang tesüsa Russian sangdong nung Ukraine nungi telangzüba kecha agüja mali.

Kasa mapang tzüsü kanga melema aliba ajanga Russian sepaitem Ukraine anüdoklen tongtipang Pokrovsk yimti telungi oteter.

Ukraine indang 7th Airborne Assault Corps ajanga ashiba agi, tzüngsang mopung, talisa tzüsü temelem aliba ajanga Moscow-i iba teraksa yimti nung par sepai tali kumdakja aser Ukraine sepaitem lungbangtsü meranger.

Russian sepaitemi iba yimti agitsü küm ka dak tema

meranga aru. Ukraine mitkar temi tang yangji Russian sepai 300-500 shi alitsü akok ta ashir aser Tir Zelenskyy-ia tensa kanga tasak kumogo ta ashi.

Kasa mapang army tekolakba Oleksandr Syrskyy-i southeastern Zaporizhzhia region nung front line len tensa kangasa tamajungba kumogo aser nisung aliba tesem asem samaogo ta ashi.

Ajisüaka Russian sepaitem Pokrovsk nung teyakyakba lir, ta Syrskyy-i ashi.

Hopta ka tejakdang Zelenskyy-ia Pokrovsk nung Russian sepai 300 shi raratar ta asadangteta liasü.



NAGALAND COOPERATIVE CONCLAVE

FACILITATE | ENGAGE | EMPOWER

18TH - 20TH NOVEMBER, 2025 || NBCC CONVENTION HALL, KOHIMA

EXHIBITION AND SALES

FRUITS & VEGETABLES, PULSES, WEAVING & HANDICRAFTS
PROCESSED FOODS & INDIGENEOUS POTTERIES



Theme:

“Cooperatives- A Catalyst for Economic Transformation”

SEMINARS // PANEL DISCUSSIONS // B2B

Supported by

Event Partner

Media Partner

Radio Partner

NWA wrestlers temi WFI chief architect Brij Bushan Sharan Singh semdang



NWA ketdangsürtem aser wrestler tem Brij Bhushan Sharan Singh den külemi Nawabganj, Gonda, Uttar Pradesh nung par kidang tangokba noksa ka yangi angur.

Dimapur, Yimpoksüi/Nov. 12 (TYO): Nagaland Wrestling Association (NWA) nungi ketdangsür ana aser wrestler 17, shirnok tang National Wrestling Academy, Nandini Nagar, Nawabganj, Uttar Pradesh nung ita ka atema wrestling coaching/ training atema oa lir, parnoki Bodhbarnü Nawabganj nung taoba MP aser taoba Wrestling Federation of India (WFI) tir aser Chief Architect, Brij Bhushan Sharan Singh semdanga par semchir tasoba

anogomung külemi munga liasü.

Pai training agirtem dang bendanga agütsütsü ayongzük aser ita ka training agiba ajanga Naga nunger kanga ajangzüksü imlar ta ashi.

Par jabaso aser Uttar Pradesh nungi MLA, Prateek Bhushan Singh-i NWA wrestlers tem den sensaksemba mapang training nung timtem ajurubatem ajanga parnok ajungmesotsü ayongzük.

Pai akokba lenmang nungi

yariteptsü ta ashi aser mapang shia parnok den ajuruteptsü ta ashi.

Brij Bhushan'er jabaso tambosang Karan Bhushan Singh, Shiba UP nungi MP lir, paia Nandini Nagar nung jangratema mungang ta Team Nagaland moatsü.

NWA sangdong ka nung WFI dang pelaba lemsatep aser National Wrestling Academy, Nandini Nagar nung training agitsü asüngdangba ama NWA dang melaba asoshia pelar, ta ashi.

Asian Cup qualifier atema India team sangdongogo

Yimpoksüi/November 12, 2025 (Agencies): Indian senior tebur national team head coach Khalid Jamil-i Bodhbarnü taruba FIFA International match window atema team shimtsü asoshi asayar 23 tenüng sangdongogo.

India team Asian Cup 2027 qualifier nung November 18 nü Bangladesh den Dhaka nung National Stadium nung asayatsü lir.

India team ya Asian Cup qualification atema kecha timla mali asünung Jamil-i, Sunil Chhetri, Sahal Abdul Samad aser Liston Colaco nunger amala team nungi teti asayaba asayartem meshimtsü telemtetba agiogo.

Team ya Brehostibarnü nungi tenzüka Bengaluru nung camp ka akatsü aser November 15 nü Dhaka-i aotsü.

Mohammed Sanan, shiba iba hopta tetenzüklen U23 squad atema jaokogo, pa senior team atema asayartem rongnung densema lir.

Kasa mapang nung AIFF-i defender Abneet Bharti aser Ryan Williams na Indian camp atema jaokogo, koba linük football asaya nung otsü tasen ka asütsü.

Arishi küm 27 tain Kathmandu nung asosang Bharti ya tang Bolivian top-flight club Academia del Balompie

Boliviano nung Czech Fortuna Narodni liga club FK Varnsdorf nungi loan nung oa centre-back ama asayadar.

Bharti den ano BFC winger Williams, shibai tawa Indian passport agizükogo, pa Blue Tigers training camp atema jaokogo.

Williams ya Subiaco, Perth nung aso. Pa tetsü ya Mumbai nungi Anglo-Indian kibong ka nungi lir. Arishi küm 31 tain asayar ya Australia nungi NOC clearance atema atadar aser Bangladesh den asayatsü aliba India team atema jaokogo.

November FIFA Window atema team shimtsü asoshi asayartem:

Goalkeepers: Gurpreet Singh Sandhu, Hrithik Tiwari, Sahil.

Defenders: Akash Mishra, Anwar Ali, Bikash Yumnam, Hmingthanmawia Ralte, Muhammed Uwais, Pramveer, Rahul Bheke, Sandesh Jhingam. Abneet Bharti.

Midfielders: Ashique Kuruniyan, Brison Fernandes, Lalremthuanga Fanai, Macarton Louis Nickson, Mahesh Singh Naorem, Nikhil Prabhu, Suresh Singh Wangjam.

Forwards: Irfan Yadwad, Lallianzuala Chhangte, Mohammed Sanan, Rahim Ali, Vikram Partap Singh, Ryan Williams.

Head coach: Khalid Jamil.

Küadang Alcaraz, Sinner nunger tajungba: Novak Djokovic



Novak Djokovic

London, Yimpoksüi/Nov. 12 (Agencies): Novak Djokovic-i kodanga tamakoktsü arishiba nungi atsüngzüka mao.

Ajisüaka arishi küm 38 nung tennis icon-i otsü yanglua 25 buba Grand Slam takok angutsü ya pa indang career nung tayongzükba tulutiba asütsü akok ta ashi.

Serbia nunger tennis asayar tejen Djokovic yagi 2023 US Open sülen Major kata nunga

takok ngua mali aser tebur tennis asaya nung Jannik Sinner aser Carlos Alcaraz nati amokbangba ngua lir. Parnok tsüngta lanur ana yagi tesüsaba Grand Slam titles ti kokogo, anungji tennis nung putu atsüngba ama aikati repranger.

"Tang kü den medemdangra, tena (Alcaraz aser Sinner) ya tajungba, aser aji adangji lir," ta Djokovic-i Piers Morgan den sensaksem dang ashi.

Ajisüaka Djokovic asoshi tatem matong.

Grand Slam champion 24 ben takok ngua alisangi, "Kü career tepiyong ni tamakoktsü koktettsüsa teti inyaka aru. Kasa mapang, ni arishi küm 39 ajunger, aser temang nung nguyangushi aser temang raksaba tejangja lir," ta pai ashi.

Alcaraz aser Sinner nati tennis asaya amokbanger aliba pai shidak ta agizük.

"Talisa Sinner aser Alcaraz mechi ni ano Grand Slam ka akoktsü kangabo temulung melemteter. Saka ni asayatet tashi, kodang ni court telung nung tetsüng ajemokdir, net sür külenji shiba aliar ni tsüboa mebilemer. Ni tajungba aser ni takok ngutettsü ta ni teti bilemer. Kü temang anema alitsü südi ta imlar," ta Djokovic-i ashi.

Djokovic-i ano Major ka akoknungbo, pai ano otsü tali yanglutsü - Open Era nung Grand Slam akoker tambotising akumtsü. Tang iba otsü ya Ken Rosewall-i bona lir, shiba arishi küm 37 ser ita ana lia 1972 Australian Open nung takok angu.

Djokovic ya tang World No. 4 lir aser taküm Majors pezüprong nung semi-finals tongteta lir, anungji pa tangsa tangbo asayaba manentsü kuli sayur.

Messi-i Telangana yimtiba semdangtsü jangjaogo

Hyderabad, Yimpoksüi/Nov. 12 (Agencies): Argentina nunger football asayar mongin aser World Cup winner Lionel Messi-i GOAT Tour atema India nung arua senzüba mapang Hyderabad semdangtsü, aser iba mapang pai linük nung yimti pezü ayimjemtsü.

World Cup akoksangi Telangana state yimtiba semdangtsü aliba osang ya Chief Minister Ravanth Reddy-i jangjatsü aser pai yongyasetba lemsatepa liasü.

November 17 nü Kochi nung asaya ka athiba sülen iba telemtetba ya agi, koba Kerala Sports Minister V. Abdurahiman-i sangdonga liasü. Hyderabad densema yongyaseta aliba Messi indang tour yagi India kinük pezü prong awajemtsü - Kolkata, Hyderabad, Mumbai aser New Delhi - koba linük nung ayongzükba saisapong sentong tongipangtiba rongnung ka akumtsü.

"Tang asenoki south lena awajemtsü. Ibai South India nung football sapur million aika nem akhum agütsüba asütsü,"



Ravanth Reddy

ta iba tour ayonger Satadru Dutta-i ashi.

"Chennai, Kerala aser Hyderabad nung Messi indang fan kanga longsoa lir. Ni iba ya pan-India sentong sūdaksünüa liasü," ta pai ashi.

Ahmedabad melena Hyderabad shimba ya pasasa agi dang lir, ta Dutta-i ashi.

Iba sentong ya Gachibowli mesüra Rajiv Gandhi International Stadium nung alitsü aser iba mapang football kisüng masü saka celebrity match, football clinicl, kenten-menü aser South India star temia shilem agitsü lir.

BILEMDANGANG

"Nai yaritsü mulunga melira temeshi."